

Iluarsiissutit

Akissuteqaat ulloq 03. juni 2026-imeersumut taarsiissut

(Immami uumasunik miluumasunik kisitsinermik aallussinissaq)

Piniakkat angisuut, soorlu Qilalukkat qaqortat qernertallu pillugit ullumikkutut kisitsisarneq ingerlanneqartassanersoq imaluunniit atortorissaarutit pitsaanerusut atorlugit kisitsisoqartalissanersoq pillugu Apeqquteqaat aallaavigalugu oqallisissiatut siunnersuut.
(Inatsisartunut ilaasortaq Gerth Mikaelen, Naleraq)

Akissuteqaat

(Avatangisinit, Pinngortitamut, Nukissiutinut, Ilisimatusarnermullu Naalackersuisoq)

Siunnersuuteqartup sammisamik pingaarutilimmik oqallisigissallugulu naleqquttumik oqallisissanngortitsineranut qujanaq.

Uumasunik piniakkatsinnik atuineq illersuinerlu pillugit aalajangiinerit paasisstutissanik tunngaveqarluni aalajangerneqartarnissaat, Naalackersuisut pingaartippaat. Tamanna ilaatigut piniartut ilisimasaat uumassusilerinikkullu siunnersuinerit atorlugit qulakkeerneqassaaq.

Nunani Tamalaani Arfanniarnermut Ataatsimiititaliarsuaq (IWF) arfernik kisitsinerit, minnerpaamik ukiut qulikkaarlugit ingerlanneqartussat tunngavigalugit arfernik angisuunik pisassiisarpoq.

Kalaallit Nunaanni arfernik angisuunik kisitsinerni nunat NAMMCO-mut ilaasortaasut sisamat akornanni piffissamik naleqqussaasoqariarlutik, sumiiffinnilu tamakkiinissaq eqqarsaatigalugit ataqatigiissaarinissaq qulakkeerniarlugu, arfernik kisitsinerit Imapriup Avannaani Immami Uumasut Miluumasut pillugit Ataatsimiititaliarsuaq (NAMMCO) suleqatigalugu ingerlanneqartarpoq. Taamaalilluni misissuinerimi Imapriup avannaa ataatsikkut tamakkeerneqartarpoq, taamaalilluni pinngitsoortinneqarsinnaavoq arferit ukiut ingerlanerini siaruartarnerini allannguutinit sunnertinnissaq.

Qilalukkanut qaqortanut qernertanullu tunngatillugu Kalaallit Nunaata Canadallu (JCNB) akornanni ilisimatusarnikkut suleqatigiissitaq ataatsimoortoq aamma Imapriup Avannaani Immami Uumasut Miluumasut pillugit Ataatsimiititaliarsuaq NAMMCO piujuartitsiffiusumik atuinissaq pillugu siunnersuisarput.

Ilisimatusartut, taakkunungalu ilanngullugu Pinngortitaleriffik, namminneerlutik ilisimatusariaatsinik, Pinngortitaleriffimmit pigineqartunik, aningaasaqarnermut sinaakkusiussat teknologiimilu periarfissat iluanni pitsaanerpaanik angusaqarniarluni atorneqarsinnaasunik sunik atuinissamut kiffaanngissuseqarnissaat Naalackersuisunit pingaartinneqarpoq.

Pinngortitaleriffimmiit Pinngortitaleriffiup suliaanut tapertaasumik piniartut aalisartullu ilisimasaannik annertuumik akuutitsisoqartarpoq. Assersuutigalugu tamanna apersuilluni misissuinnikkut, aalisartut, piniartut, ingerlatseqatigiiffiit suliniaqatigiiffiillu oqaloqatigalugit ataatsimeeqatiginerisigut, aammalu suliniutinik kisitsinernilu najugaqartunik suleqateqarnikkut

ingerlanneqartarpoq. Tamatuma saniatigut aalisartut piniartullu ilaatigut allattaaviit atorlugit paasissutissiissutaat, tulaanneqartut aamma Piniarneq Pinngortitaleriffiup ilisimatusarnikkut suliaanut paasissutissatut tunngavigineqarnerat pingaaruteqarluinnartumik inissisimapput.

Ataatsimut isigalugu Pinngortitaleriffiup inassutigaa, Kalaallit Nunaanni arfernik kisitseriaatsit pioreersut, nunani tamalaani ilisimatusartut suleqatigiiffiinit akuerisaasut ingerlalluartut saneqqunneqassanngitsut. Kisitseriaatsit ukiut 40-t ingerlanerini ineriartortinneqarsimapput, aammalu nunat allat kisitseriaasiinut ataqatigiissaagaallutik. Timmisartuniit kisitsisarnerit akuerisat piffissap ingerlanerani uumasut amerlassusaannut siaruarsimanerinullu tunngaviliisuusarput.

Taamatut oqaaseqarlunga sammisaq pingaarutilik pillugu oqallittoqarluarnissaanut Naalakkersuisut qilanaarput.